

序

太史公踰沅湘涉洞庭履夜郎健爲之踰而西  
南爨傳作豈非車轍所經足跡所到然後山川  
之塊潏卉裳芻衣之風土荒碑殘碣之紀載羽  
鱗狸互之產人物之秀寓公之棲託有可覩指  
而縷數與九州廣矣列在職方其較遠者莫黔  
與粵若粵則自陸大夫橐裝西歸後通中國徃  
徃不絕黔則見於經史格有苗伐鬼方以至度  
五溪開夜郎高賢大良持節奉使皆將必有車

轍馬跡焉若滇則自漢武以來或離或合固不  
俟宋藝祖畫大渡河而後與中國絕也元明以  
來史乘始不絕書逮

世祖皇帝廓清海宇拓版籍一車書備文物而滇始  
大壬子夏五予得捧

簡書與典秋試歷襄荆之險塞溯辰沅之鬱紆歎越  
嶺牂牁之盤礴而阻阨輒欲小有紀載補裨官  
之缺乃馬瘖輟敗不及命筆粗用強識以故蠻  
雲瘴雨隰柘山荆時時往來胸臆間歷數朝輒

忽忽忘之矣登頓萬里銘賦無傳不幾負此山  
川風土碑碣人物之殊異哉試事旣竣鶴沙先  
生出帙相示顏曰滇行紀程始於庚戌冬出  
春明終于辛亥秋入滇南其間廣谷大川危峯  
複嶺以及村墟蠻落豐碑石棧標新領異始讀  
如獲異書再讀如見故人竟讀如觀吳道子畫  
嘉陵山水有聲有色陸大夫之語太史公之傳  
何多讓焉昔左太冲張平子賦三都兩京綜核  
考訂皆積十許年其門庭籓溷皆着紙筆先生

則從篋輿絡索星飯水宿間不期月而成書才  
華敏麗巨細兼該此事自應獨推史公滇行記  
可不作矣

年家眷侍生西泠邵嘉胤頓首序



序


人當仕宦之年堂有老親陳情得請其脂轄而還  
也凡王程所歷感覽會心所可述而誌者不特東  
山之零雨南仲之霏雪與東門祖帳之車幾兩馬  
幾匹也余與鶴沙先生同里同籍其出處志趣亦  
約畧相同獨余自癸巳因母疾請急下潞河涉淮  
泗望泰山之嵯峩擊黃河之澎湃晝夜行三百里  
而不及紀乙未以

使事入楚便道省覲趨漢江經二別自武昌順流而東九江雲物六代山河粲然在目復奪於驛路交游而不得紀至巳亥

恩俞歸養其取道與癸巳同然春秋殊候緩急異情渭北江東在在可紀而意濶才疎臨毫輒滯歸當採蘭藝黍之餘憶向時閱歷如雲烟過眼不可復追爲之三嘆今先生入滇還里往來各有紀程其往也王事靡盬不遑將毋有小雅之悱惻焉其來

也來歸自鎬我行永久有大雅之忠厚焉余讀之怦怦有動乎其中而不能已所謂樂其志趣之同者非耶若夫以忠孝之餘閒極文章之能事使山川險易如掌上螺文蘇公海外子厚柳州或庶幾焉余又安敢與先生較同異也

康熙癸丑仲夏年春弟王廣心題於清峙堂



序


古者採風之使輶軒至止咸紀其山川道里以土  
物宜俾觀者如身履其地燦若指掌其原始於禹  
貢與國風不出几席而九州十五國得披籍而覽  
焉至若山巔水涯探奇選勝與土人之指示故老  
之告語則未能縷悉也鶴沙觀察才光東觀當讀  
書中秘時仰慕司馬子長李青蓮之爲人亦欲遊  
五嶽足跡遍天下迨後出而之豫章之汴蜀蔽蒞

之地所至俱有餘慕及茲觀察滇南以紀程一冊  
郵示其詳誌幽奇似柳子厚小石城山記其行文  
奔放似鮑明遠過大雷岸書其述譎異感今昔似  
于寶搜神似茂先博物似李華弔古其說郡邑堡  
衛沿革興廢似輿圖考鶴沙功名禹盛建泉萬里  
之外澹泊自守瞻戀慈幃一舉念不忘忠孝故其  
情之留連盡致不可名狀豈若康樂日率徒衆舉  
火伐木致土人駭爲非常而乃公徒恣游覽者茂

吾聞天下名山大川在人耳目間者固自不乏此  
皆人跡所能至是以得而口述之筆載之至於壁  
立千尋浩渺萬頃或巖嶂層疊或雲水兩窮人跡  
罕至歎攀躋之無自慨溯洄之莫從又不知其幾  
何雖有善遊安能一一登涉而紀其概乎洵耳目  
之外常有恨事也鶴沙問序於余予輒就鶴沙耳  
目所已及者卽古太史採風無以異此盍如禹貢  
國風並進以爲

當宁獻

康熙癸丑年表兄施維翰拜撰



滇行紀程

華亭許纘曾記



康熙九年十月初七日。吏部侍郎勒德渾艾元徵引纘曾同陪推鑲白旗三品郎中加一級蔣廷柱入

朝。

上御太和殿。傳臚武進士。羣臣朝賀畢。退御乾清門。召纘曾廷柱入見。

滇行紀程

上問姓名年歲籍貫出身。暨前後履歷甚晰。俱一一奏對。

天顏睟穆。德音和亮。旋命出外候。

旨。翼日點用雲南按察使司按察使。二十五日進。

太和殿謝

恩。十一月二十五日領勘合兵牌辭。

朝。十二月朔。由會同館起行。是日大風嚴寒。行者皆戰栗。驢馬踟躕不能前。朔三日次定興。風稍定。朔

十日次灤城。大雨雪。十一日次沙河。一望瓊瑤。周道如砥。憶自通籍以來二十三年之內。凡五渡流沙。未嘗見此佳景也。十九日次延津。黃河水凍。加以積雪。憑高一望。河形盡失。土人服牛駕車。履冰逕渡。間有一二沉溺者。以故嚙

命之使。蹣跚而不敢前。父老爲言數十年來。河水凍合。未有若斯之甚者。二十日遂取道陳橋。陳橋兩岸皆冰中。通河流一綫。乃鑿冰而渡。廿一日次河



南開封府開封爲纘曾舊遊地彼中父老故吏猶有牽裾泣涕者纏綿數日乃南行二十七日次歸德雪益甚平地深七尺餘車馬如行夾道中寒氣相逼往往僵仆人畜有失足陷雪中者輒尋覓不得以故往來行旅斃於途者甚衆除夕宿會亭驛驛中無官舍得茅屋一間篝燈爇火以辟寒氣每念慈親在舍獨子遠行暮景無依不覺潸然淚下康熙十年正月朔旦次永城朔三日次南宿州憶

辛卯年纘曾以史官得請於

世祖章皇帝令馳驛省親道經於此遇鳴鏑者十騎白刃相向急率廝養七人彎弓力敵殺其黨三人生擒其七縛致州守迄今二十年矣城東耆老猶有侈談往事顧而問焉者追思曩昔翻爲色變十一日次揚州時當大水之後流民遍野編篷而居一夕大雪凍死無算民間子女但可得食卽相隨爲僕婢矣十五日次瓜步阻風二十五日泝江

而上。二月朔二日。至江南江寧府。從京師由汴。梁揚州至江寧計站四十七。計程三千里。朔七日。由龍江關。泝流二十里。日雙閘。十里日大勝關。十里日三山。十里日江寧鎮。四十里日和尚港。對江爲芝蔴港。三十里日采石磯。橫江屹立。畫圖難盡。月明過此。迴想開平帶礪。供奉金貂。俯仰江山。爲之達旦。自采石三十里日摩崖。十里日牛頭河。十里日梁山。兩山夾江。爲長江門戶。故曰天

門。兩山謂梁山博望也。自天門山十里日四合山。二十里日寡婦磯。磯僅丈許。孤立大江中。二十里日蕪湖。非岍爲螺磯。土人云老蛟蟄焉。十里日魯港。二十里日三山峽。三十里日舊縣。卽舊繁昌也。二十五里日碯子磯。磯上有城。梵宮修竹。鬱然秀麗。相傳明末時。兵書阮大鍼屯兵拒左。兵處也。十里日荻港。三十里日紫沙洲。十五里日老鶴嘴。十五里日銅陵縣。三十里日大通驛。十里日老龍池。

俗稱老洲頭是也。自老龍池歷梅根葛港清溪凡四十里。曰池口驛。卽池州府界。遙望九華森列。高出雲表。四十里曰烏沙峽。十五里曰太子磯。磯橫列大江之底。勢如劔戟。舟行其上。常惴惴焉。五里曰呂陽驛。望北岬爲樅陽鎮。三十里曰黃盆驛。三十里至安慶府襟江負山。江心左右沙堆墳起如門戶。洵吳楚之咽喉。金陵之雄鎮也。自安慶行十里過夾洲。二十里過黃石磯。三十里過吉陽。二十

里過盧灌口。十里過雷港。二十里過東流縣。十里過香口。二十里過花陽鎮。二十里過磨盤洲。三十里過馬當山。二十里過小孤山。小孤矗立江心。峰巒聳秀。右爲江西之彭澤。左爲江南之宿松。梵宮琳宇。長松古栢。錯雜相間。長江一奇景也。自小孤十里過黃茅塘。三十里過彭澤縣。十里過涇江口。鎮俗云鱗魚嘴。土人言此地每歲有猪婆龍爲害。天寒水涸。輒崩岬壞屋廬。今古岬已在大江心。泊

舟者油物煎熬。龍卽出。舟人切戒之。夏月則不忌也。三十里過八里江。對江爲湖口縣。入江西分路。又六十里至九江府。望匡廬萬丈。綿亘兩省。彼中風景。非尺幅之所能述也。大約由金陵至湖口。南行而稍帶西。由湖口至九江。則正西行。由九江至武昌。又向西。非行矣。而非多於西。此江形曲折之大勢也。自九江百一十里過富池。入楚境。二十里過田家鎮。此地有甘興霸廟。彷彿富池。甚靈異。土

人言。昔年有史官莊回生。典試楚省。夜泊廟前。夢甘將軍來拜訪。索莊一僕一馬。皆莊所愛者。夢中不得已諾之。詰朝僕馬俱斃。地有神鴉。往來江上。帆檣過此。不拘餅餌粒食。撒空飼之。羣鴉飛舞。接食百無一墜。食畢。間有集舟檣之杪。送出廟境。俗謂將軍遣使送客。其聲啞啞。類慈鳥。上下三十里。皆有之。亦一奇也。三十里過蘄州。三十里過魚秧口。三十里過道士袱。有山橫踞江口。雄偉而秀麗。

山產方竹多題詠石壁瞰江江流怒湧長年過此  
未嘗不動色相波二十里過散花蓼二十里過回  
風磯二十里過瀾溪三十里過巴河四十里至黃  
州府府城之西有嚴瞻子者字楚璧精於子平理  
二十年前曾聞其名與之言多奇中與尋常日者  
迥異且云癸丑當再會此地未知果驗否也黃州  
起行不數里遙望對江赤壁卽東坡賦云西望夏  
口東望武昌者是也武昌今武昌縣非會城夏口

卽今漢口也查楚乘所載赤壁鏖兵在嘉魚以上  
距黃州四百里非黃州之赤壁一曰黃州乃赤圻  
非赤壁未知孰是自黃州三十里過三江口四十  
里過奚磯四十里過龍口峽十五里過陽邏三十  
里過青山頭三十里至湖廣武昌府從龍江浙  
流至武昌計程一千五百里風便則十日可達否  
則或二十日或一月內外不可以姑計荒江野岬  
隨處泊舟波濤風鶴之虞所不免焉武昌濱江  
滇行紀程

之城樓。卽黃鶴樓也。樓彷彿古制。重建雄敞傑出。升  
第二層。望大江洶湧。自東下環遶。省會乃北流而  
去。江山雄麗。扼要踞險。眞天地之輿區也。樓上塑  
費僊師跨鶴像。堂後陟山。有石鏡亭。又數武。有僊  
棗亭。二亭最古。元泰定中。碑記尚存。建亭之山。爲  
黃鶴山。今俗名蛇山。以其形似也。山南平地數區。  
道士云。此楚王宮故址。武昌對江。曰漢口。漢水出  
焉。禹貢所謂岷山之源。至於大別。南入於江。

又曰龜山。亦以其形似云爾。

漢口爲商賈居積之地。帆檣如織。煙火萬家。歲遭  
回祿。輒鼎新如故。皆旅客爲之。非民力也。凡驛舫  
至此。例易舟而上。問漢口居民。皆言由武昌府乘  
舟。歷金口。牌洲。嘉魚。及祭風臺。鴨關。驛至城陵磯。  
從此西去。泝大江。至荊州。入夔門。竟達蜀省。從此  
南去。十五里。至岳州府。入洞庭湖。穿湖三百七十  
里。收龍陽縣。泝沅江。而達常德。凡千餘里。風波之  
瀕行紀程

險大湖之隔。曠日遲久。難以計程。從陸則計日可到。乃舍舟陸行。

自漢口四十里。瀟口鎮五十里。黃陂七十里。楊店五十里。孝感四十里。雲夢四十里。應城六十里。官廳四十里。日觀音崖。崖卽京山之枝。旃巖足洞空。天銑海屋。石浪波疊。僧人支架度成佛殿。尚有餘巖。覆殿之外。西隅有樹一株。大百圍。生崖中。色幹與石無二。而其枝葉盤引洞外。還蔽殿宇。可數畝。

陰所謂枕榔木也。殿外東隅有娑羅樹一株。亦大百圍。去娑羅二丈許。又有榔樹一株。大亦適等。其根幹輪囷離奇。細葉卷翠。不可名狀。山下石碑刻百丈泉三字。書法甚濃壯。旁款曰劉崙書。而其泉乃在山上。二十里。京山縣此邑風景盤鬱。人民頗饒。自東入境以來。兩山羣繞。高原奧登。古今人物相望。得非山川之勝。蔚爲人文耶。六十里。郢東驛。六十里。安陸府入南門。曰陽春門。闌闌鬱起。城郭

雄溪遙睇象山雙峰對峙儼二獸蹲踞水厓望而知爲勝地。漢曰雲杜。明初爲安陸州。蓋明世宗潛邸。至今王城故址猶在。踐位後陞承天府。亦設興都留守司。如鳳陽故事。南城雉堞樓閣一準江陵云。按此郡於古爲郢中。楚子自荆遷郢。乃僭王號。其國始大。傳稱漢陽諸姬。楚實盡之。則渡漢都郢以後事也。由府城西行三里渡漢江。卽岷江也。俗謂之襄河。蓋謂自襄陽東下。故云。然而忘其始。

矣。漢江之西有莫愁村。盧家有女名莫愁。善歌舞。常被召入楚宮。詢土人曰。在蔓艸中。莫識其處。四十五里三尖山口百頃舖崇岡。陟降屢屢見虎。夜望虎眼甚綠。一開一合。土人諱言虎。謂之山荒。楚蜀之通稱也。六十里荆門州。州城西有泉在山麓。亦曰惠泉。泉從地中出。構亭其中。泉繞亭外。色味俱佳。州人謂之龍王泉。荆門左右山漸高。馬漸多。從者時時見之。自荆門出南城。有關一座曰虎牢。



關五里曰虎牙關。今廢。十五里曰新市。舖關廟。巋  
矢高峙。傍有磨刀石。碑記俗謂青龍偃月刀者。畱  
廟後。蓋先主借荊州。漢壽亭侯以前將軍鎮其地。  
新市之野。則建立壁壘處也。七十里建陽驛。九十  
里荊州府。郡居江漢之交。形勝扼要。秦拔郢置南  
郡。是其地。六朝時以荊襄爲上游重鎮。江左安危  
係焉。從漢口陸路至荊州。計站一十四。計程八  
百餘里。山川景物。耳目之所共見。共聞者。不具載。

止紀其道里之遠近。郵傳之界址。云爾。通計京  
師陸路至滇省。昆明縣凡站九十四。荆居途中。  
六月初二日。由荊州陸路出南關。遵江而西。四十  
里渡小河。又西三里。澧口。卽松滋縣界。二十五里  
艸坪鎮。宿。自荊州至澧州。分兩路。凡乘傳至江  
陵者。十月至。三月從東路。公安縣接應。而遞至澧  
州。四月至。九月從西路。松滋縣接應。而遞至澧州。  
此湖南更定郵制也。時當夏秋之交。例松滋應付

乃由艸坪南行十五里沙陀觀渡沙陀灣五里至蓮花蕩口泛小漁舟打兩槳入蓮花蕩盤繞數十折總不出蒹葭菱芡中舟人皆採菱以嬉久之乃出湖方知此中別有洞天已而湖光蕩漾微風夕起不覺艤舟柳下蓋自蕩口至此凡行十里遂登陸入松滋縣新治宿縣四面環湖週方五六里古稱僊風鎮離舊治四十里人跡罕到之地因故堞未修邑宰暫棲水際遂令南北乘傳使者飄然

一葉入茫茫煙水之區池韁脫牽人馬艱危倘有不虞咎將誰諉由松滋新治夜渡西湖乃登陸西南行二十里陳家廠路多馬車徒僕從呼唱震林谷帟亦不懼二三成羣徐徐緩步而已十里裴家河渡河上嶺西望九岡山峰巒積翠色黯黯然其下則松滋舊治也又西南行乃入紆岡連阜夾道青松古香染袂凡二十里岡阜盡處爲界溪橋至澧州交界宿由界溪橋上岡子松柯列蔭山

原秀美。凡三十里。彭家塲三十里。至澧州宿。澧州守道蘇叅議寶言。荆有一行僧。行雨事甚奇。僧故江南人。澧轄有揭家河。界中苦旱。僧自言能行雨。衆延之。祈數日不效。乃絕食欲。積薪自焚。土人恐扶之去。僧曰。姑畱得雨。卽行矣。土人不可。臨行。曰。月望日必雨。我雖去。請畱一驗。是日當大雨。尺餘。雷始發。必先擊某大樹一株。方爲我所請。否則非我功也。至十五日。果大雨盈尺。雷初震。果先擊

此樹。如僧言。衆信以爲神。雨竟。雷伯不能去。電母亦隨之。或焚牛牢。或燒民舍。轟聲走繞不休。衆大懼。奔至州。復延此僧。遣雷。雷乃去。由澧州東門涉小溪。渡蘭江。楚辭云。沅有芷。澧有蘭。故謂沅爲芷。謂澧爲蘭也。登岬二十里。盤山十里。東山舖十里。五泉舖十里。新田舖十里。新化驛宿。自過五泉舖以後。回巒曲屈。松陰散落。與界溪前後。意態相類。加以林外遠山。澹抹雲際。從此入常。俱作畫

供矣。由新化驛南行二十里沙溪舖十里熬山舖一路長阿婉變多翳松密篠點染濃秀林間茅屋兩三家炊煙起處唯聞燃松之香谷鳥一聲衆山皆瘦雖驅車憔悴不覺神與之俱也十里木子舖十里馬鞍舖十里大隆驛宿由大隆驛南行十里五十里舖十里四十里舖皆躡兩山之足及至聯頂鑿路中分十里三十里舖豁然寬平結成府治三十里至常德府宿從荊州陸路至此計

站七計程五百里凡京師入滇者由河南南陽府出新野入楚境歷襄陽荊州而至常德由秦晉山左入滇者亦取道河南南陽府至常由西蜀入滇者陸路一出建昌衛一出遵義府若舟行則下夔門過江陵而至常由吳楚豫章浙閩入滇者水路則溯長江渡洞庭而至常陸路則取道漢口歷京山孝感安陸荊門而至常唯百粵與滇黔接壤或由黔省安籠或由滇省廣南俱可直達昆明若

由水路出洞庭者仍泝常而上蓋常爲京省水陸必由之戶故宦游賈客入滇黔者多寓家于此云。由常德水路至鎮遠者於西門覓舟大者曰辰船容二十餘人舟至辰沉而止小者曰舸船容三四人可泝五溪直達澧水逆流牽挽層累而上計程僅千二百里然灘多石險一月方達且辰沉一帶不設遞運以故乘傳之使從陸者居多焉。由常德府陸路者過西門橋橋下大溪發源牂牁從

沅辰至此東注洞庭者也二十里灤河鋪十里高吾山山下有崔婆泉相傳有崔婆釀酒飲僊人張虛白卽此山麓爲武桃二邑分界處十里渡鄒溪卽西上鄒溪市遂入桃源欄楯由鄒溪十里涉呂真渡十里延泉鋪十里潼沔渡相去不遠有勸善寺寺前漳江夜月爲桃源八景之一傳聞江上漁人常於晦日見水底映月著意窺伺卽不見十里至桃源縣宿。邑無城郭倚山爲城因江爲池白

渡鄒溪後。皆陶記中所謂良田美池阡陌交通之  
地。望之覺煙林淒澹。平疇散風。遠峰低映。若隱若  
見。所過亭落。棄麻雞犬。如在雲中。及其將至。則碧  
江斜帶。秋痕見底。乃沅江也。江上羣山翠黛環繞。  
東南其最高者。南行數里曰菴蘿山。道書四十二  
福地。驚巒聳立。正當邑治。清靈虛無。縹緲萬狀。神  
仙之所居也。由桃源縣西行二十里。卽進山。從此  
以往。高高下下。一路皆山矣。五里至白馬渡。溯流

沿山而行。左瞰空江。右挾岩壑。其地卽道書所稱  
白馬浪光之天。渡江登嶺。折下平田。五里過桃川  
舖。渡小溪。折而南。過僊徑亭。乃入桃源山。山之陽  
有洞曰桃花洞。又曰秦人洞。桃花源記稱武陵漁  
人緣谿行。忽逢桃花林。林盡水源。便得一山。捨船  
從山口入。初極狹。纔通人。復行數十步。豁然開朗。  
屋舍儼然。雞犬相聞。村中自言先世避秦時亂。率  
妻子邑人來此絕境。不復出焉。故後人謂此爲秦

人洞攀蹬而上。至洞口石壁峭立。縱廣丈餘。洞外有瀑布千尺。挂絕壁而下。雖大旱不絕。瀉潭中行里許。伏地不復見。又非行三里。與桃花谿合流出。大江潭在洞門外。深不可測。內有潛龜。身長而窄。鉤吻類鸚鵡。背生鬣。尾帶甲如龍鱗。名曰黃靈異。產也。循洞而下。有石橋橫跨兩山。俗謂之遇僊橋。其初駕石懸成。危傾欲墮。歷千百年。不知所始。近世重修。竟失其舊。橋畔多產方竹。虎鬚。蒲黃。精等。

藥相傳。洞門半闔。半啓。近代有中丞郭某者來游。見一童子持香出迎。卽乘雲冉冉去。郭歎曰。此僊境宜秘。乃壘石扃之。今洞門如故。但有紅龍碧蘚。終古長封。陟山半有桃川宮。萬壽觀。卽邑人黃洞源。修真處。有弟子爲辰谿瞿童。童仙去。洞源東游茅山。復見童。謂之曰。吾將蹈東海矣。次日亦羽化。今觀前有摩頂松。爲瞿童翬舉之。樹旁有煉丹臺。臺下有淪鼎池。皆其遺跡。桃川後臨大江之濱。曰

桃花蹊斷呀千尺。靈風窅然爲漁郎鼓棹處。稍上  
又有纜船洲。卽出大江爲桃源後洞。洞有門。高不  
數尺。踞沅江之滸。今前後兩洞盡成孔道矣。或云  
漁郎卽黃道真。後道成入僊。故此地又云靈仙之  
府。唐人王右丞劉賓客作桃源詩。皆言雲中雞犬  
秘宇靈宅。真以秦人洞爲仙窟矣。韓蘇又辯而非  
之。耳目之外。何所不有。並存於人間可也。過桃花  
源十里。同人鋪八里。沉溪溪甚狹而深。不可測水。

色爭綠。侵人人馬俱航渡。四里鄭家驛宿。由鄭  
家驛西行十里。竹瓦鋪。二十里燕莊鋪。十里長坂  
鋪。十里塘底鋪。十里新店驛宿。自入桃源以來。  
人馬俱行谷中。每望前路。往往阻絕。忽山迴峰轉。  
又闢一境界。泉聲四起。山容媚人。衆鳥鈞。朝秋花  
滿路。政如入于久秋山。萬壑圖中。每思驛路通衢。  
尚怡人性情如此。倘一筇一笠。得汎濫於幽蹊絕  
壑之間。可以忘饑矣。由新店西行十里。楊塘鋪。



十里馬鞍山又名馬鞍關兩傍特起中乃坳下形  
類馬鞍下與登山絕頂至坳下處俯瞰隔溪諸峰  
橫攔腰腹間小雨初霽樹色層層皆黝然以青氤  
氳淡重遙望峰頂雲氣澹抹數片真妙墨也馬  
鞍不甚高輿人云前路高山自此始矣下嶺過太  
平舖渡溪入幽谷行十里寧鄉舖過此入辰州府  
沅陵縣界西行十五里楊家舖十五里官塘舖五  
里石龍關未到關見兩旁高山夾立赤壁湧起排

突青冥高可百丈中夾一道通人行甚狹迴峰盤  
抱凡數折而至關頭合處壁益聳道益狹至頂僅  
丈許飛石斜距森森欲來搏人真絕險據勝之區  
也下嶺復數折如前又五里關隘乃盡更度一坡  
至界亭驛宿由界亭西行十里親捷舖上亂石  
坡既峻且長入武桃以來所未有也十里上馬鞍  
嶺俚諺云馬鞍山上叫哥哥前頭還有大山坡言  
此嶺非高前路高坡方未艾也凡澗岡謂之嶺者

黔楚謂之坡。下坡十里獅子舖。十里楠木舖。十里楊步舖。十里馬底驛宿。此站初分七十里。以舖司。迤亾并爲六十里。由馬底西南行五里。上青山坡。頗高峻。五里白霧舖。十里嵩溪舖。五里上馬仰坡。五里下坡。至淘飯舖。十里新安舖。十里長田舖。道旁有碑曰神助張公射虎石。五里望城坡。五里至辰州府之辰陽驛宿。此站高坡甚多。辰陽驛在辰郡之南。岍凡使車往來。皆在隔江遠眺。

城郭丹碧隱隱。若雲樓蜃窟。大江浸淥。迴抱三面。孤舟西去。風帆渺然。此一靈府也。郡在秦爲黔中地。名山二。西清川。五谿。自古稱勝城。非五十里外。卽永順土司之所居。今方恭順。辰州界內。殊爲宴安。由辰陽驛西行十里。蘭溪。航渡而西。登啞。卽古藤舖。十里清水舖。十里仰溪舖。十里涉麻溪。至麻溪舖。上下麻溪坡。十里楊溪橋。甚修。救過橋。卽楊溪舖。十里狗尾舖。五里涉小溪。五里船溪驛。

宿。此站稍平。溪邊見農家取水灌田。巧而且逸。其法先於溪旁築石成隘。上流水至隘。勢極奮迅。乃設竹車二圍。制如車輪。大可二丈。縛數節竹筒。緣于兩輪。其筒向內。一面截口受水。每筒相距三尺許。兩筒中間縛編竹版一扇。以遏流水。所以激輪使旋者。全在此。蓋水勢迅則衝扇行。而輪乃隨之以轉。每激一扇。後扇繼來。旋而上升。則筒中滿水。已至車頂。筒口向下水。卽下傾于其傾處。剝大

竹受之。接引入田。雖遠可到。所謂農者坐而觀之。無舉手之勞。而田已畢溉矣。大江以南。水勢平衍。不可用其有潮汐之地。似亦可仿而爲之也。山

船溪西行十里。散水舖十里。乾溪舖前行有乾溪洞。洞深數里。後通辰州大江。五里界亭。十五里辰谿縣城垣。圯廢。居民蕭索。出南門渡江。水勢湍急。移時得渡。向西南行十里。石碑舖十里。漢江舖十里。山塘驛宿。此站稍平。大西山大西洞卽在邑

境今荒蕪矣。辰邑山溪最爲奇勝。自船溪至邑四十里。一望巖石林立。態色之妙。彷彿太湖靈壁。車馬都從石罅間行。或高如削壁。或砌如欄階。或如馬嘶虎踞。或如祥鸞奇鬼。或如樓闕。或如煙雲。種種駭嘆。得未曾有。居民皆藏石塢中。短竹周遭。時見煙升。從風卷散。似輞川圖中。非垞意。景至若辰溪城市。四圍俱石骨奇擎。謂之五城山。楚威王使將軍莊躋定黔中。至此因山築城。是也。城南一

帶。則有石屋巉空。臨江數仞。與疾流奔響。互爲吐吞。尤出人耳目之外。試登山一眺。大江映淥。自黔中過沅東下。將至辰溪境。乃折而從東。過西直抵邑城下。又見西南來大溪。發自貴州銅仁府。從麻陽來。所謂麻陽江是也。亦抵城下。與東來大江合流。而環抱邑境。過邑後。又折而東趨。遶邑之後。界所云乾溪洞。通江卽通此。遶後之江。從此委宛。周遭盤帶。辰郡由桃經武。乃出洞庭。此其大勢也。由

是而言。辰邑江環岩秀。宜有人物挺生。而今古長寂寂。何歟。豈噴吮斃削肉不藏骨。蘊釀不厚。未可知也。由山塘驛南行十里石芝鋪。十里小龍門。坡不甚峻而頗長。十里中火鋪。十里金錢鋪。十里大山鋪。爲辰沅交界。十里白牛鋪。一曰白水。十里懷化驛宿。由懷化驛西南行十里小田鋪。十里石門鋪。十里版橋鋪。十里應口鋪。十里順溪鋪。十里新置羅舊驛宿。此站路平。由羅舊驛西南行。

十里石橋鋪。十里羅舊故驛。芷江在左。清華引。曉與日行險。亥者不同。十里巴洲鋪。十里火燒鋪。十里七里鋪。七里至沅州。從東門入偏沅舊署宿。此站路平。查明制萬曆中設偏沅衙門。以撫苗。半年駐沅州。半年駐偏橋衛。爲黔楚重鎮。近爲言路。建議割湖南七府并郴靖二州設湖南巡撫。駐長沙。置藩臬。而偏沅遂廢。舊署之東舍有古栢。纓絡垂絲翠色。可把數百年物也。州治元妙觀。中有唐

明皇像。治銅爲之。相傳天寶中尚方所頒也。此州火神不祀。祝融而祀凌霄女。一不虔則神女立遣火鴉。噉火丸置茅屋之上。兩翅扇風發火。居民屢屢見之。故州多火災。由沅州南城沅水驛向西行過江西橋。橋長半里。上鋪大版。下有十六洞。每洞基上構木爲屋。列肆貿易。兩旁成市。中如長街。入楚以來。此橋最爲弘敞。東額曰龍津砥柱。雅稱度橋而西。北望明山爲沅城所憑倚。若幃帳然。

此地卽古龍標城也。西南行十里竹坪鋪。十里巖田鋪。十里娑羅口。五里冷水鋪。上栗子坡。過栗子關。下坡十里卽栗子鋪。見大江焉。石子泚泚可數。灘聲疾鬪。奔赴沅州。人馬皆遵江右而上。碧光濺影。淡可丈餘。淺不二尺。隔溪人家。映見林際。又有淺山低黛。襯帶萬重。至短車過處。傍石壁而行。路闊四五尺外。此皆驚灘駭流。下望神悸。及仰而觀之。石壁高數十丈。苔痕妙染。下印江渚。壁有斜飛

者常欲薄人面。真清妙景界。往於蜀道嘆絕今。入此再易耳目矣。十里便水驛宿。由便水驛渡江。人航渡馬涉渡。西行十里過楊輿五里對火舖五里上坡度蜈蚣關。此坡迢遙高聳爲辰陽上下諸坡之冠。下坡五里波川舖二十里新田村十里晃州驛宿。此二十里間江乃在左。直至晃州驛山溪清麗。一。如便水境。驛吏言此處昔爲八蠻洞口。詰朝過平溪則四面皆苗穴矣。由晃州驛前渡

江人馬俱航渡。西行十里過酒店舖右挾江而行。多聞灘聲山下路多坎塹不可施足者架木補之。覆上于上如棧道。此栗子關下迤山一帶皆然。十里大魚塘十里鮎魚舖十里南寧舖十里七里塘七里平溪衛宿。衛城垣墻已頽民舍俱瓦礫唯公館軒整無改舊觀。衛本隸楚今屯糧入夫馬支給屬黔省報銷浪偏清三衛皆然。蓋衛而兼驛驛官如贅旒矣。自沅以上至平晃間晚禾垂實與

吳下同風。不似武漢長衡間。夏末秋初。銓穫已竟。故米色甚美。此站所歷多湍水壞道。時方值旱。車馬行亂石中。倘遇水發。民多病涉。由平溪北門。江在城下。西行百餘武。涉渡野雞河。十里過三家橋。十里秋溪鋪。十里馭鶴橋。土名太平橋。至羊坪鋪。一路皆右挾江聲而西上。二十里非渡江。至清浪衛宿。衛城前臨江。後包非山。其寬衍三倍。平溪民居亦稠。地產香稻。其形圓實而大。味亦至

腴。山中多寒。所莠皆晚禾。惟其晚登。故滋本淡。而名實茂。由清浪西行五里。過雞鳴關。關在高山之上。一覽衆山濛濛無際。下臨百丈之江。滌漚環繞。秦關百二未足云奇也。五里過梅溪哨。上一坡亦名栗子坡。不甚峻。十里小溪哨。十里平安哨。五里紫雲哨。五里渡江。人馬俱航。渡卽上。嗥爲焦溪哨。此二十里內。每折一徑。時與碧江左右遇。故爲幽勝。渡焦溪入貴州界。西行五里。過武定哨。十里



兩路口亦云大勝哨。哨東有長橋，建亭其上。東額曰霄漢長虹，西額曰齊雲飛渡。此溪甚狹，題署似乎太奢。五里老虎崖，石徑峭厄，有瀑布出橋下，如吼。自此以上，泉響潺潺，相續不絕，側耳聽之，聲塵爲之一斷。十里過大石橋，至鎮遠府宿。府無城郭，負山面江，北有石屏山，高挿雲表，江水環之，秀麗殊絕。隔江爲鎮遠縣，闌闌相接，風煙涵澹。此地古爲大田谿洞，元時始置鎮遠府，明室因之，今亦

無改。郡前有額曰澗水名都，其來遠矣。時當秋仲，天氣頓寒，雨後如吳中。初冬，此貴省風候也。東遊大石橋，橋旣長而堅，致東題曰天塹飛虹。西題曰螭鬪星躔，度橋而東，遊中山寺。從下仰眺，但覺一二窗楞在石罅中，疑無隙地，可構僧寮。及至洞口，顏曰中元洞。入洞，登階數層，上有平堂，甚廣，浮巖下覆如屋。又南旋，更闢一洞，石簷四出，從洞口俯視溪橋，碧浪東流，小艇藏壑。其南岬則丹樓酒

肆。倒影波心。維時秋雨初晴。斷燵數幅。帶青鳥西飛。竊以爲此景不可多得。出洞而西。忽又有精舍三椽。堂內僧炷香坐禪。旁一僧告曰。辰沅小舟至此而止。以上不施篙楫矣。因前去數十里外。有諸葛洞。內頑石爲梗。通水而不通舟。洪經略至此。曾役千夫鑿洞中碍石。謂此洞一通。便可用舟饋運。直至偏橋衛。省負擔之勞。無算。無如鑿者未竟。而石梗旋生。乃罷議。貴省各屬產米精絕。盡香稻。

也。所釀酒亦甘芳。入妙。此二事楚中遠不及。而天下未有舉爲哀譚。具詳志之。以告好事家之知有黔也。從常德府陸路至貴州鎮遠府計站一十六計程九百七十餘里。

八月初十日。日出鎮遠西關。向西南行五里。至油榨關。自下而上。鳥道一綫。及頂鑿山通道。僅容一車。上有迎僊宮。祀真武。旁列民居數家。皆新築。舍又五里。白楊舖。又五里。相見哨。乃上。大小相見坡。三

山連起久之始下坡共十里至劉家哨又七里過  
華嚴洞梵宇莊嚴洞在其後四旁石色槎牙洞口  
石象當門彷彿生動燃炬而入有石羅漢石觀音  
蓮臺法象皆備由羅漢之左石壁攀緣而上石罅  
廣尺許匍匐而進復得一洞甚深廣有石龍床石  
龍枕依稀若有鱗甲再入則杳渺莫測矣出洞三  
里乾溪又五里黃土坡又五里望城哨此坡亦峻  
俯視偏橋城市如在目前故云下麓二里許渡沙

坪橋其下爲沙坪溪過橋卽見諸葛洞沙坪溪出  
口處外有大溪橫攔里人云此大溪源自黃平州  
至此入洞以出鎮遠者也洞在兩山交處青石爲  
門如城闕徑長數丈水由洞中出過洞卽成大溪  
窄洞內有石骨隆起舟不能達相傳諸葛武侯曾  
繫通以運糧後復隆起梗距至今而其名乃繫諸  
葛以傳又八里偏橋長虹臥波左右山峰如繒過  
橋入衛城宿由偏橋衛出南門向西行上一坡

亦曰望城坡。十里過艸塘舖。又十里沿沙舖。又十里瀾橋嘴。又十里至飛雲岩。岩洞高竦。石態飛舞。冉冉若蒸雲。奇秀特絕。內供佛像。憑欄一望。岩外三峰如髻。擁翠浮來。尤爲逸出。其一峰高者曰香爐峰。上有亭曰聖果亭。王文成畱有碑記。至於狀石形貌。曰石羅漢。曰石獅子。皆彷彿形似之語也。岩下有泉。幽閔莫測。下岩數步。有古栢數株。蒼然獨立。大可十圍。色甚孤嚴。經秋愈傲。入黔以來多。

童山。此樹不概見也。山口有寺曰月潭寺。寺外石橋橫鎖。綠苔涅痕。橋下泉聲碎碎欲瀉。居然一洞天矣。去岩百餘武。過東坡舖。又六里餘。過玉峽橋。橋之非石。壁聳立。潔布出焉。題曰玉峽飛虹。又四里過十里舖。舖西有石橋甚飭度。橋後卽上小坡。又五里過石龍橋。又五里至興隆衛宿。其城上圍南山之半。下圍平田。民居或就山塢。或築阡畔。高下點染。層層合法。此丘壑雅林。非城市也。何意

於此衛見之。由興隆衛西行登南山大坡。俗云土地坡高極無際。已而窮其巔。俯羣山如培塿。白雲潔素。但抹腰際。猶露遠峰數點。一似明江靜浪。隱隱波動。中有上指一峰。問何名。則三十里外崇安江上香爐峰也。又五里燈艸哨。又五里黃猴舖。又五里石頭舖。又五里周洞舖。皆於巔頂平行。周洞舖以西。乃漸下坡。坳又十里崇安江口。方下平地。今設腰站。上坡以來。四顧大岩。皆諸苗之窟。

中唯大路一綫。爲漢朔往來之區。故前代於此倚江築堡。以壯形勝。坡上所見苗嬪。青布裹頭。與男子皆跣足。衣旣百結狀。亦奇醜。語言侏儻。殊不可解。行者多戒心焉。崇安江水出自平越。以上苗澗中與沅水之發源。并荆者異派。從此東注。則道於黔陽。而至於洪江。乃經邵陽下洞庭。源甚細。而流則長矣。過浮橋。上小觀音坡。三里爲對江舖。又上坡行四里。過老君關。又上坡二里。至絕頂高。滇行紀程

處凡數折。回視興隆南山等峰，皆下伏矣。是日大觀音坡。又六里羅仲舖，其上爲羅冲山，與葛貢山相望。未入版圖時，苗人嘗負固於此。從山腰漸下五里，過羊場舖。塲西路傍有大風洞，舉炬而入，莫竟所之。五里洛登舖，十里至清平衛宿。衛屬都勻府麻哈州界內，同城向立。清平縣今裁併公館後庭，有雙松直立，亭亭可喜。由清平衛西行十里，過樂邦舖，十里臘梅舖，十里楊老堡。初出門似

俱行平岡，無甚峻險。將至楊老堡，忽下坡數百仞，方信離衛城已陟高嶺處，而不知其高也。至此始爲平丘，別有谿壑，結成雄堡。今設腰站，渡橋爲楊老舖。過舖上雞塲坡，二里雞塲市，八里羊塲舖。上羊塲，或平行數百步，更上絕頂，曰陸齊雲。自此下坡，亦稱陡絕。曰倒馬坑，皆苦於行者之嘆詞。十里過三郎舖，五里至葛鏡橋。橋下爲麻哈江，兩岬削立，江水淡不可測。昔有渡船，屢遭覆溺，自萬曆中

土人葛鏡捐貲造此。往來行旅卽謂之葛鏡橋。近橋左右里許。路峻滑。頗欽。巡撫都御史冬公築欄馬。皆一帶甚固。行者便之。橋右建三元閣。翬飛鴻舉。望之肅然。既登西岬。回視絕壁之下。淥澗與長虹相映。帶真異境也。西五里至平越軍民府。宿由平越府南門度石梁。過南街道旁。有高真觀。爲張三丰仙師道場。觀內真容尚存。從此向西南行。有卓筆山。三山擁立。形似筆架。青插霄漢間。稍西

遂上高坡。曰倒馬坡。坡半見隔山石壁如屏。懸岬千仞。壁上有仙師影。首戴華陽冠。側身杖策而行。分明可數。其傍刻神畱字。宙四大字。云是仙師畱記。爲海內靈蹟。凡五里盤數折而上。踞坡之巔。曰武勝關。土名上馬營。望向者卓筆山。如揖如授。而已五里。穀子。又十里西陽鋪。嶺路險。又十里黃絲舖。今設驛站。此地俗近苗。彝女德不戒。而黃絲爲尤。斯夜郎之乘間濮上也。五里過裸羅橋。上

猓坡卽連上江西坡。又五里冷溪鋪。忽下坡數百仞。過小澗五里。上谷滿關。又下坡五里。過岩頭鋪。此路鳴泉滿逕。觸日涓涓。又五里打鼠嶺。前後奇峰矗起。或削壁憑虛。或危巒堆翠。起伏坐臥磊砢萬狀。隔山綠嶂中。挂瀑布二條。如白龍下垂。頓使心日濺冷。因漫舉四景以志慕戀。題山二。一曰雲中曉閣。一曰陸海游龍。題泉二。一曰碧落垂簾。一曰天吳咽鼓。比日所見皆童山敗井。今觀此爽

分自失矣。又五里至新添衛宿。

蓋自下嶺而後。

奇奧旣窮。乃有綠疇綺陌。宕爲煙衢。而衛城居之。至於列岫排衙。翠閣屏障。帶水漣漪。送涼橋畔。又不待言矣。山新添衛西南行五里。過馬乘冲。乃登嶺。嶺上甚明霽。俯視白雲如絮。遍滿山谷。已而下嶺。車馬入雲中。一丈以外。望人影若蒙紗。罩穀寒氣逼人。不禁肌粟。又五里至乾溪洞。又五里至馮虛洞。洞周闢如華蓋。皆石乳滴成。岩竇四隅俱



有龍象之形。諸洞皆然。惟此洞中央樹一圓柱。下  
巨石底上撐覆蓋。山麓別有小洞曰母豬洞。水聲  
遠震。吼若轟雷。五里瓮城橋。又五里龍井灣。又三  
里太平哨。又二里新安哨。又五里雲頂關。蓋狀其  
坡之高也。自關而下。有黃牛洞。洞無足道。惟山上  
有三圓峰。特显。又五里隴聳舖。又二十里至龍里  
衛宿。自鎮遠以上。塘撥相望。使車過。輒擊柝送  
迎。瞭望之職甚修。以故盜風衰息。山龍里衛西

南行十里。過高寨哨。又十里谷覺哨。數里之內。路  
平如掌。黔省所希觀也。又五里上千家土地坡。坡  
上土地廟。高尺許。纍纍以千數。皆四方估客過此。  
砌石爲之。各書本貫姓名。祈保平安。又五里畢舖  
哨。峰巒如立。迥異衆山。又十里龍洞哨。望東方所  
過高山。皆在足下。插天圓峰。僅如青螺浮海面。乃  
知會城已在萬山之上矣。又十里至貴州貴陽府  
宿。省城明初設貴州宣慰司。至隆慶中改貴陽

府環城九里七分。自南至北，街道甚闢，市肆咸聚。從來談者皆謂滇南重地，而取道于黔中一綫。黔省總爲通滇計。矧明時二百年中，黔常多事，不及滇雲之盛。近則黔地漸安，荒蕪漸闢矣。貢院本布政使司署，今改爲貢院。正南文筆峰卓立中門，奇秀出于天表。地多雨，四時皆然。一日之內，乍晴乍雨，全不可料。城之南門曰迎恩門，門外觀音寺最著，登高閣望東，非諸山其高勝者曰趙

壁。曰棲霞。其東方一山似三台連起，俗名老黃山。又云真武山，爲總督衙門之後障。督署蓋西向也。西爲振武門，門外多垂絲柳，卽江浙之西河柳也。東爲昭文門，城外山老黃山麓，逸城濠至北門，見趙壁山自艮方入城，爲貴省來龍，雄偉有神。將轉遂接新城，新城已殘廢。城之西隅遇一老人，張姓，土著民也。其言宣慰司安氏向與流官中分而治，以城中十字街爲界，西屬宣慰，東屬流官。

故府西一帶舊稱老苗城。天啓中與守土臣不協。乃招水西酋長安堯臣陷龍里。攻省城。自天啓二年二月初七日被圍。至十月初一日督師張鶴鳴援兵至。乃解圍。後朱熒元繼至。始平定議于舊城外。聯築一城。謂之新城。以護城外居民。工竣于天啓四年。周九里三分。自孫可望由蜀出黔。乃大築省城。撤新城石爲之。新城乃毀廢。又言水西安氏素鴛鴦爲滇黔大患。

本朝乙巳年

命帥師。深入其地。討平之。遂置四府。設流官。水西一

帶土地盡入版籍。安氏之桀者皆就殲。邇來苗民漸染華風。亦猶蜀播之楊氏滅而設遵義。今反爲樂土也。老人年耄而語頗非。非故記之。非爲布德門門外。直非大街。商旅所集。自城門非至川王廟。爲金陵街。又自川王廟非至新城。非門止爲廣東街。山川王廟轉西行。至新城西門止。爲四川街。凡

南北車徒往返。皆止于此街。縱橫四五里。不失會城氣象。

八月二十日自貴陽出北門。至新城西門。向西南行。耳畔聞泉聲。可喜。十里至阿江。峭又十里至湯。把峭俱平行。岡巒中不覺其峻而已。至絕頂。從峭嶺一墜。則黔南文筆峰已伏其下矣。又五里。狗場。又五里。倒樹。峭又十里。黑泥。峭又十里。威清衛。宿。茲二十里間。路坦平。無險阨。自謂已履平地。然觀

右畔青山尖頂。似數點芙蓉。若可俯而捫者。則人馬已行巔際久矣。方信自貴陽而上。日加隆聳。未可以丈尺計也。從來見雲霞之狀。如畫中之樹。扁而不圓。至此。衛館舍西南。一望羣峰。矗立。俯瞰白雲千頃。變幻百出。或如沸湯。或成堆壘。昔之所稱爲車爲布爲輪爲馬爲牛。皆不足以狀其妙。蓋仰觀則雲形成片。俯視則雲氣之全體皆見。怪怪奇奇。無所不備也。自阿江峭而上。大道如髮。乃

屬漢其左右高山內盡爲苗穴。然皆輸糧赴差如齊民其種類白苗黑苗花苗不一。直北百里卽水西地彼中多產良騎質小而蹄健登危磴若平地。但覺西產龐然大耳。歷險則蹣跚展轉不及水西之駿。故滇黔多貴之。衛屬本羅甸國據鑪嶺澄江之中。衛城東獅子山奇峭不羣。上有佛閣其來滋久。居人言近時有何福者本衛人。偶遊陰崖逢一老闍棋從旁看不休。一老者分半桃食之。福歸

家絕煙火處分家事。隨上山養真三十年。不食人間一粒粟。不飲人間一勺水。一日道成。忽尸解去。僅數年前事也。此方人遂號此山爲何福山矣。城內有叢林寺。遇一老僧朴野甚。四川重慶府人言此寺雖陋已三百年。建文出亾時實潛此里之長者。布金構寺居之。今佛像甚古。猶是建文所塑。後移居非去二百里外白雲山。在廣信州界內。最後方入滇。又言衛人於丁亥年爲孫可望殺盡無子。

遺今城內外張市肆稱居停者多蜀客非黔種也。傷哉。由威清出南門又過關廂外城兩城聯帶形如皂帽故俗名紗帽城從此向西南行十里至滴澄舖又十里過長寧哨舊名茶花舖又十里鎮彝舖此舖本名樓梯哨今東首山上尚有堡存明季苦苗人出沒設此示防哨在山故取義於樓云。堡西南有山踰遠可望不可卽曰銅鼓山昔諸葛武侯南征獲銅鼓於此今其地亦有農居然仲家

苗多從山口出入此山前後左右苗種各別又有蔡家苗農家苗皆有頭目仲苗則屬役於安氏。苗民無城郭或三十家五十家據險而居以防弋獲每一處合募一勇士號曰老虎飲食供奉有加焉戰則老虎當先指揮調度合諸苗計之爲老虎者不知其幾千百也又西行十里過界首舖又十里至平霸衛宿。白滴澄而上石道欹確兼多泥滑行人病之入黔界後所觀高山皆拔地而起鏡

峰參天。仰望至高。離貴省來。羣山並矮。但有尖頂。如撮髻。或如火焰拖末而已。竊怪黔以上諸山。何以不高。久之。乃悟身行絕壑之巔。祇與尖鋒爲伍。去山根拔地處。已崔嵬萬仞。其高可勝言哉。過界首後。四山盤礴。又上望城坡。乃入衛。凡楚黔諸衛。皆踐山爲城。內地頗隘。獨平霸結城。平崖風氣寬衍。故人材間出。由平霸南門向西南行十里。砂子舖。又十里坂隴舖。又五里水橋。又五里中火。

舖。又五里阿若舖。又十里羅德舖。又十里安順府。宿。此郡元爲習安州。明爲安順州。今陞府。城圍九里。闌市宮室。皆弘敞壯麗。人皆以白石爲墻壁。石片爲覆瓦。估人雲集。遠勝貴陽。昔嘗議立省會於此。乃秤土輕重。不及貴陽。故釋此。從彼。今移提督駐此。以鎮盤江。地稍平衍。山勢各自特立。不相牽屬。自平霸至安莊。山形多圓。下而銳。上如椽栗。如蜀附。如蒙古營帳。如懸鐘。覆釜若大若小。星

羅碁布凡一峰墳起。必有石垣圓圍數重。一層盡又圍一層。似鬼工所斲。圓整分明。真宇內所罕見。其餘諸山。或玲瓏小巧。或峰巒秀麗。樹色青葱。而英靈所鍾。不聞有奇瑰之士。殆不可解也。城內有塔山。在圓通善寺後。遙望非煙。非雨。飛秀欲絕。附郭有曾定衛。明初設曾定軍民指揮使司。將以襟帶三州。其權甚重。故今黔民但言曾定。而不知安順。威之所歸久矣。由安順西南行十里。楊家

橋舖十里。馬場舖五里。大山哨五里。龍井舖十里。至鎮寧州之安莊衛宿。山形圓疊之妙。與安順同。惟米色則貴紅而賤白。由安莊西南行五里。爲觀音洞。洞口石壁千仞。下穿一穴。曰一天門。門外有洞。水淡莫測。門內卽第一洞。中安大士弘願。奇特石溜。倒垂。鱗吻刻畫。洞左拾級而上。復有一洞。石質變幻。與大洞相類。石溜成柱。大數圍。擊之一成鐘聲。一成鼓聲。洞口之右。直上五六丈。又得



一洞曰雙明洞。置三教像。洞內又一洞。較雙明洞稍小。旁又得一洞。更小。而黑極。境界之奇矣。古道原從洞中經過。後因石路崎嶇。而野苗每藏石隙中。剽剝商賈。故今改道嶺外。又五里。阿橋舖。又十里。白水舖。行未里許。見瀑布如簾。倒瀉石壁。羣峰直上。高入雲表。卹然爲之氣盡。五里白虹橋。橋上回望。瀑布更飄三四折。入溪。疾度橋下。西去。過橋。逐溪行。忽聞有轟雷聲。不息。與人云。此望水亭泉。

聲也。又五里上望水亭。龍湫直下。白練千條。噴珠卷雪。注入百尺綠潭。雖天朗氣清。而激水瀆濺。如行大霧中。數里以前。所聞雷鳴者。蓋在此。低徊久之。不覺歎絕。里人云。潭內故有水犀。風清月皎之夜。時或出現。其龍湫挂處。內有水簾洞。甚深。突不可窺。土人多入此洞避兵。昔孫可望至此。亦見水中。有神物。乃改瀑布於右澗。下令屏水待乾。索之。而潭水絕。深岸數日不可竭。乃止。望水亭在高岫。

造對此飛泉。明時所建。今燬已久。澗中有碑。無從  
摸索。題款但見其傍有雪浪川霞四字。山川之間  
爲瀑布者多矣。未有若此之大觀也。鎮寧州境至  
此亭止。過此則入永寧州境。又五里乃上雞公背。  
最爲崎嶇。又久之。陟嶺上。望隔山小穴。內有石雞。  
冠距悉見。狀若飛鳴。又五里。大四峭。又五里。上黃  
土坡。高而復長。既下坡。則藍水橫前。向東南去。有  
橋曰仰橋。上名瀾陵橋。仰望關索嶺。赫然雄峙。雲

霧沉沉。不見其頂。度仰橋。卽登關嶺。險峻陡削。莫  
可名狀。行人至此。氣竭神阻矣。五里乃達嶺表。嶺  
半建伏魔大帝廟。廟在高臺之上。臺下有竹絕奇。  
名曰綿竹。俗曰旛竿竹。圍大如青松。僧云六七月  
方抽筍。至來春二月方布葉。時當九月。筍已高四  
五尺外。黃內綠。尚未解籜也。廟門外有啞泉。昔孔  
明南征。軍士誤飲此水。輒啞。後人封之以石。今泉  
脉閉矣。廟後有泉。頗甘美。謂之磨刀泉。絕頂祀順  
滇行紀程

忠王俗稱小關王廟廟貌甚偉苗部俱畏威德人  
廟者無不羅拜世俗謂前將軍第三子曰關索  
從諸葛丞相南征孟獲威勛甚盛沒而民思之爲  
立廟於此此嶺以其名名之未攷何代勅封義勇  
英武威烈感應順忠王然以理揆之前將軍志稱  
有二子長曰平次日興平與前將軍俱被害于臨  
沮次興爲丞相所器重任侍中嘗監軍有令聞無  
所謂第三子名索也陳壽作三國志漢習蜀事安

有前將軍令子且有震世功如索而失其名無是  
理矣甚至有丞相不察投軍自効語益屬不經或  
曰諸苗謂父爲索猶言關父如岳忠武之稱岳爺  
爺也其說似矣然伏魔大帝與順忠王鑿然兩廟  
並峙則春秋之受羊豕享王號者得非次子名興  
者歟與旣爲丞相所器重嘗監軍則丞相有大征  
伐或領護軍建偉績以震懾諸蠻理或有之後閱  
謝肇淛滇略云漢昭烈章武元年以李恢爲庾降

都督隨丞相亮南征○大破蠻兵○功最居多○封漢興侯○時左將軍雲長之子索○亦有戰功○開山通道○常爲前鋒○未審所據何書○再閱諸葛元聲滇事紀略○云建興三年五月○武侯渡瀘水○進征益州○從征自趙雲○魏延外○如張翼○王平○句扶○及雲長○少子關興○卽關○尤以驍勇前驅○多建奇功○觀此則從前臆揣○若自符合○又考雲南通志○載路南州○非亦有關索○嶺以其險峻○必引之以索○而後能度○此又一說也○

存之以備討論○過嶺下坡止一里○至迎恩舖○宿下坡○無幾猶在嶺上也○由迎恩舖西南行五里○小溪峭○又五里北口舖○又二里過馬鞍橋○度馬鞍嶺○卽連上安籠箐○凡十里至安籠舖○人行峭壁間○竹樹青翠○水聲潺湲○又五里乃登絕頂○至高無上○視關嶺殆過半○而未若關嶺之陡絕者○以其屢有起伏盤屈○可以息足○然行道者苦之○謠曰○人由安籠箐○馬怕哈馬莊○爲其高之○又高故也○稍下嶺○

百步有居民數家。隱翠篠間。少息。又上象鼻嶺。山形似象。孤高陡峻。四圍皆淡箐。俯臨千仞。唯中梁一綫可梯。人行象鼻上。故云。及至頂下。望千山圍簇。僅如城堞。青天可齧。碧落低垂。極目蒼茫。真有凌雲之致。又五里上頂站宿。頂站卽永寧州地。穹窿無極。去天不遠。山頂在雲霧中。濃陰成雨。終古不晴。秋月重裘。奇寒徹骨。州守林華皖云。此地水西流矣。馮時可滇南紀事云。滇中日月星辰。

視他處較大。至此見太白一星。光芒輪廓。果覺有異。山勢崎嶇險惡。站前後數十里。驛騎倒斃甚多。道旁僵臥。臭穢逼人。諸苗見之。輒解所佩匕首。割肉入懷。喜動顏色。由頂站西南行五里。梅子梢。又五里。黃土舖。乃上黃土坡。陟頂下坡十里。新舖嶺道甚險巖。又下坡五里。非極觀竹樹佳秀。旁有清泉一池。周以白石。喘息負戴之徒。見之若甘露矣。又下坡五里。至盤江。江出烏蠻。經七星關。奔

騰至此疾下東南至廣西泗州而入南海。江廣三十餘丈水淺無底左右石崖廉利如劔戟自昔濟此者皆渡船行駭波中一不戒輒葬魚腹古法必樹杙于兩涯貫之以索憑索曳舟乃得橫渡所謂狀歌是也狀歌卽牂牁故遂以名江成都楊慎曰牂牁今貴州地其江水迅疾難濟立兩杙於兩岍中以繩緝之舟人循繩而渡予過其地見盤江與崇安江皆然因悟古人制字之義可見嘉隆以

前皆用狀歌濟無有議建橋者天啟初水蘭酋難作黔滇道絕時有安曾朱監軍道建議築橋以通滇先於兩岍築石墩高一十三丈有奇寬亦如之鎔鐵爲扣聯扣爲索每索三百餘扣扣重十八九觔索凡三十綆貫兩岍石窟中索上橫鋪巨木蓋以大板石視水犀之屬爲橋鎮者悉備焉又以索末所餘十餘丈盤紉鞏固費金錢巨萬起工於崇禎元年正月落成於三年十一月此所謂鐵索橋

也。自流寇變亂。僅存鐵索數條。順治十七年督撫會

題得請。發帑金重修。撤去殘索不用。飛梁架木。狀若金閭吊橋。康熙二年六月。江水大漲。橋復壞。又請帑金重建。旋修旋圯。康熙七年十一月。安順府知府李益陽彭錫纓。前後督工鼎建。如十七年製。而堅固高聳。仍用舊索縈繞。以防搖撼。橋上起版屋。以避風雨。遙望空中樓閣。橫亘江心。惜無善繪。

若作圖以記之。橋東有關聖廟。西有大願寺。乘高臨險。一覽無遺。夾江皆營伍。西南一岸築衛城。如帶。以爲欄護。真天作之險也。然順治庚子入滇之師。從水西紆道。潛度。初不由此橋。道旁有石壁。題曰在德。然哉。然哉。過橋卽上盤江城。削磴盤躋。數百仞。行者喘噎。今設腰站。又五里過盤江舊城。又五里至保甸舖宿。由保甸舖西南行五里。凉水井。又五里哈馬莊。山路皆亂石滑突。凡入黔驛。

馬俱釘鐵掌。至此則蹶者傷者益多矣。又十里至安南衛宿。衛城甚壯。據萬山巔際。是夜空霄凝寒。衾裯雖具。不異露處。里人云頂站及衛城高踞山巔。其氣嚴冷。盤江在兩山之塢。天氣頗暖。行者皆裸體揮汗。三日之間。寒溫迥別如此。由安南衛下嶺。行至尾灑山。五里湧泉寺。旁有泉。築石圍之。碑題漢關將軍飲馬池。稍南望陡壁。上有蜂房大如車輪。懸綴岩際。似川中石室。又五里烏鳴關。

俗名舊老鴉關。又五里烏鳴舖。又十里錯茄舖。又十里上江西坡。坡亦高峻。伏而又起。今設腰站。下坡五里。隨上沙子坡。陡極。又五里泥納舖。又十里芭蕉舖。又五里白雲坡。亦云荔枝坡。又五里至新興所宿。安南至新興沿路多煤山。然所產不及京師。白關嶺至此層纍而上。絕無平地。凡岩壑左右苗類甚繁。輿徒力役皆苗也。每輿夫一名。父子兄弟皆隨之。互相更代。以均其勞。疾走若飛鳥。



漢人戲稱之曰同年。則輾然色喜。不知其何所取。義聞呼踴躍也。貴州苗九種種類各別。大約垂髻垢面。語言與黔人不同。以布帕裹髮。高盤額前。所佩七首。終其身未嘗解。無絮布。雖大寒亦止。披破氊一片。或犬羊之皮。裒廣三尺許。風從左至。則披左肩。風右至。則披右肩。或掩於背。或負於背。居高山大箐中。不產稻。唯食苦蕎雜糧。性貪悍。輕生。跌足走險。易于爲亂。雖饑寒迫之。亦由漢人欺其

愚而侮之太過。忿激而成也。由新興西行五里。

過五里哨。前此多頑山。至此始見有短松相引。又五里至羅漢松。則兩峽松柯夭矯奪目。隨路掩映不絕。乃下坡行。頓入澗中。雲氣鋪白。或透尖峰。隱躍或露松頂。浮翠竊意。蓬萊方丈之間。境界當如是。行十里至版橋市。入市而西。遂度版橋橋。下瀑布如簾。似浪排岸而下。從西南來。注東。非夫度橋。乃上鸚鵡坡。長松夾道。秀聳亭立。無風而濤。

又盤屈數十折。偃仰萬狀。蔽景切雲。老龍脫鱗。樵  
斧迷徑。豈復人間世哉。又五里華納哨。稍轉仰望  
鸚哥嘴。若從天際將落。危瞰孤出。盤羊鳥籠。氣與  
天通。不險於此。及至其頂。則有新闢二道。坦平可  
喜。蓋鸚鵡菴行僧鑿山通徑。以避人于險。自此無  
石嘴之患矣。又五里華納舖。又五里軟橋。今設腰  
站。又十五里舊普安。又十里水塘舖。是三十里間。  
荒落殊甚。又十五里至普安州宿。州境於古爲

夜郎地。今屬安順。故安順府境。控御甚遙。由普

安向西南。沿山麓行。少頃卽上雲南坡。險亥迢遞。  
將及巔。名龍擺尾者。陡絕難行。凡六十丈。又最上  
爲江滄口。始陟頂。此處斷崖成徑。峻滑不可支足。  
過一小菴。又西上爲避陰坡。凡此三險。總曰雲南  
坡。故此坡特長。凡十五里。至蒿子舖。又十里海子  
舖。又十里上大坡。過大坡舖。又十里過娥娜舖。乃  
上娥娜坡。此二坡亦高而長。又十里至亦資孔宿。

由亦資孔西南行十里火燒舖上梁家墳坡十五里平彝所永安舖又十里龍家溝此一路岩石林立不乏松楸引帶迤邐娛人又五里上坡乃入滇境上有石龍古寺今廢但存觀音院及關聖殿左右有兩坊一曰滇南勝境一曰彩徹雲衢下坡行五里經關坪哨至東舖又五里玉真觀又五里至平彝衛宿從貴州鎮遠府至平彝衛計舊站一十八又新設馬站六共站二十四計程九百九十

餘里入滇後遂見山松秀直石質瑩潤十多赤墳頓覺地氣冲融雲彩妍麗其山亦峯盤巒伏一嶺之隔與黔山面目迥異計江南鎮江府逆流而上歷全楚泝沅江至鎮遠水勢如建瓴則黔省已在最高處又從鎮遠至滇南所過萬山皆拾級而上間有下坡然較之上坂十不及二三及至平彝望貴州如在釜底向之所歷諸峯叅天蔽日者皆俯而視之則滇之高更不待言矣夜觀北斗

訝其甚低。今考北京北極出地四十度。江南北極出地三十二度。雲南北極出地二十四度。則北斗之低也宜矣。地高則風勁。故曰貴州無日不雨。雲南無日不風。風多揚沙。拔木。然風每從西南來。尚未解其故。謹識之以問識者。自平彝而上。過省城。歷大理。永昌。騰越。地益高。氣益熱。四時草木不凋。花菓皆先期一兩月。或兩三月不等。至期仍復有之。如桃李秋冬吐萼。臘月間華實並見。及春爛

熨如故。諸卉皆然。然邊城屬邑瘴癘傷人。未常不因氣熱之故。有舒無斂也。

九月朔二日。由衛城入境。平岡風日。善氣迎人。一路青松泉石。俱得畫理。彷彿非苑筆意。不似黔中之亂山鬱積。絕無隙地也。五里清溪洞。洞口廣延數丈。再上有臺。石乳下滴成柱。再入。則燃炬而行。石床石几備焉。再入里許。旁有石縫。僅容一人。盤屈而升。天然有堂。奧門戶。土人言尚有十餘里通

紫泉洞。然幽闕。宵冥不可入矣。及出見旁。又有一洞。上有石鐘鼓形。宇宙靈奇。無所不有。高山大川之間。若此洞者。又烏可勝計哉。又五里多羅鋪。又十里凉水井。又十里腰站鋪。又二十五里至白水驛。宿。由白水驛西南行十五里新鋪。十里獨樹哨。又五里海子鋪。白水至此。皆行岡磧中。絕無水泉之利。可以耘禾黍。惟種苦蕎。給食而已。又五里陸家哨。又五里下白山坡。其上有白山寺焉。下此

山後方入平田。農舍錯連。阡陌承漑。遙見東南海子。一巨浸也。水艸之湄。漁舟上下。煙光平遠。頗類江南水國。又五里至交水宿。由交水向南行田畝中。十里新橋。西南行二十里。過三岔堡。又十五里響水鋪。又十五里黑泥哨。又十里至馬龍州宿。由馬龍州西南行十五里。過趙州哨。又五里滄浪鋪。又五里大哨。又五里箐口哨。土名烏龍箐。又五里黃土坡。又五里青石坡。又五里白塔鋪。又十里

版橋又十里趙福舖又五里永寧哨又五里永靖  
哨過哨五里上小關索嶺嶺路盤屈人行其上形  
如之字關廟踞山之巔廟前羅漢松二東一株大  
數十圍扶疎夭矯料非唐宋間物廟門內鑄銅人  
銅馬大殿祀關王庭中倚丈八鐵矛二殿祀關聖  
殿左樹鐵桿偃月刀前後二殿壁間皆繪關聖父  
子功蹟大約皆演義所載三殿祀后宮廟祝四五  
人皆年八十餘蒼顏鶴髮亦人瑞也武侯祠在關

廟之旁額曰三代以下一人左一碑曰漢武侯平  
南會盟處 滇黔之間嶺以關索名者六在黔之  
安莊者一在滇之馬龍新興澂江路南江川者各  
一永昌亦有關索寨有稱順忠王者有稱英烈侯  
者有稱龍驤將軍者一時未得其考而此邦之人  
畏威懷德懷桷呼噪烝嘗勿替非關聖父子聲靈  
赫濯何以使漢焚翁服今古同歸一至此耶 是  
日敬具瓣香焚帛入廟致告其詞曰

康熙十年歲在辛亥。秋九月朔八日。雲南等處提  
刑按察使司按察使加一級許纘曾謹告於

漢壽亭侯之神曰惟

神忠義凜然。威靈無外。稟乾坤之正氣。奠

天子之疆圉。凡屬含生。靡不稽首廟庭。春秋崇祀。纘

曾一介豎儒。濫叨祿位。備官中外。十有六年。白甲

辰以來。微罪去國。力田事母。詠戴

堯天。

皇上以纘曾爲無過。特恩召用。廉訪滇南。茲於季秋

吉旦。路經關嶺。備陳悃愾。敬盟於神。自今日以往。

恪恭受事。公忠勤慎。表率屬寮。上答

朝廷委任之恩。下慰通省吏民之望。倘或到任之後。

離任之前。黷貨徇私。見利忘義。擾民間一粟。受屬

吏一文雅。

神有靈。是誅是殛。俾戮及其身。禍及其家。殃及其

嗣。唯

滇行紀程

神有靈。尚明鑒之。謹告。

詳觀關嶺大勢。發源處自乾方逆行而上。若千軍萬馬擁護而前。入首星體貴重。有太乙天門氣象。至結局處。千山圍抱。八風伏藏。面前層層拱拜。形勝備矣。竊意此中有佳地。豈關廟足以當之歟。時當九月。見廟中蜀葵與木樨並開。以爲甚異。及至館舍。則薔薇木香錦葵等花俱發。是月抵省後。則建蘭水仙茉莉及紅梅桃李同時爛熳。萬里之

外物候之奇。觸目驚心。類如斯矣。下嶺五里。至易龍宿。由易龍向西南行十里。至鎮遠舖。又十五里。納禧舖。過舖乃下坡。坡以下入雲南府嵩明州界。逢卓流水澄泓。上迥彌廣。卽嵩明海子之委瀾也。又十里。河口峭。赤山廻頓。湍流發聲。水益浩大。又十里。羅傍舖。又十里。下大山峭。又五里。海潮菴。菴上建有高閣。俯臨海子。遙對西山。一覽在目。循菴而西。山坡上下。石骨稜嶒。半跨水澳。所謂怪石



臨淵。硯石巔。洵有之矣。又西行五里。過塔山。其石自麓至頂。累累俱青鐵色。天台萬馬渡不及也。再前行。有毒泉碑。相傳有奇樹生於此。名曰白鶴香。每歲花時。各山毒蛇鳩鳥皆集樹下。泉流其旁。人飲輒死。今樹已伐。行者猶相戒焉。又五里楊林驛宿。由楊林十里者。察舖又十五里。大樹哨入昆明縣境。又十里。渾水塘。又五里。赤水鵬。又五里。觀音塘。又十里。版橋驛宿。十一日由版橋十里。

上大坡哨。望滇池在東南之間。浴日吞天。浩淼無際。又十里。十里舖。又三里。歸化寺。又七里。至雲南雲南府。從平彝衛至省計站七。計程四百餘里。本日祇受雲南按察使司印一顆。

勅書一道。十二日望。

關謝

恩受雲南按察使司事